



AVOKATI I POPULLIT

Adresa: Bulevardi: "Zhan D'Ark" Nr.2
Tiranë, Shqipëri



REPUBLIKA E SHQIPËRISË
AVOKATI I POPULLIT

Mekanizmi Kombëtar për Parandalimin e Torturës,
trajtimit ose dënimit të egër, çnjerëzor ose poshtëruës

Tel/Fax: +355 4 2380 300/319
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 202300107/1

Tiranë ___/___/2023

Lënda: Rekomandime për inspektimin e bërë në Komisaratin e Policisë nr.3,
Tiranë.

Drejtuar: Z. Tonin VOCAJ
Drejtor i Drejtorisë Vendore të Policisë Tiranë

TIRANË

Për dijeni: Z. Muhamet RRUMBULLAKU
Drejtor i Përgjithshëm i Policisë së Shtetit

TIRANË

Z. Altin LILA
Shef i Komisariatit të Policisë nr.3 Tiranë

TIRANË

I nderuar z. Vocaj,

Mekanizmit Kombëtar për Parandalimin e Torturës, trajtimit ose dënimit të egër, çnjerëzor ose poshtëruës, në vijim Mekanizmi Kombëtar (MKPT), seksion pranë Avokatit të Popullit, bazuar në nenin 19/1 të ligjit nr.8454, datë 04.02.1999, "Për Avokatin e Popullit", i ndryshuar, kreu një inspektim në Komisaratin e Policisë nr.3 Tiranë.

Inspektimi u krye në datën 01.02.2023, sipas Planit të Inspektimit të miratuar nga Avokati i Popullit. Në përbërje të grupit inspektues ishin znj. Nertila Qafzezi dhe znj. Gloria Çarkaxhiu me detyrë nd/komisionere pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014, "Për Policinë e Shtetit", i ndryshuar, procedurën standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019, procedurën standarde "Rregullat teknike të shoqërimit në mjediset e Policisë së Shtetit", miratuar me Urdhërin e Drejtorit të Përgjithshëm të Policisë së Shtetit nr.938, datë 24.07.2019,

si dhe zbatimin e rekomandimeve të Avokatit të Popullit të bëra gjatë inspektimit të mëparshëm.

Institucioni i Avokatit të Popullit, pasi u njoh me konstatimet e grupit inspektues dhe nivelin e zbatimit të rekomandimeve të lëna nga inspektimi i mëparshëm, ka detyrimin kushtetues dhe ligjor t'ju parashtrojë konkluzionet përfundimtare, si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetasit e privuar nga liria, grupi i inspektimit u takua me zëvendësshefin e Komisarariatit z. Erjon Dani dhe shefin e rendit z. Agron Dosti i cili u vu në dijeni lidhur me qëllimin e inspektimit.

Në vijim, z. Dani informoi grupin e inspektimit, për gjendjen e kushteve në të cilën ndodhen ambientet e shoqërimit të këtij komisarati, masat e marra për garantimin dhe mbrojtjen e të drejtave ligjore të personave të privuar nga liria në këto ambiente, si dhe për zbatimin e rekomandimeve të Institucionit të Avokatit të Popullit nga inspektimi i mëparshëm.

Grupi i monitorimit, pasi mori informacionin e nevojshëm inspektoi ambientet e shoqërimit, zyrat e punonjësve të policisë, si dhe u njoh me dokumentacionin përkatës ku pasqyroheshin veprimet e kryera me personat e shoqëruar dhe të arrestuar apo ndaluar.

Nga verifikimi i zbatimit të rekomandimeve të Avokatit të Popullit në inspektimin e mëparshëm, rezultoi se¹:

1. **Ishte zbatuar rekomandimi**, për marrjen e masave të menjëhershme, për mbylljen e dhomës së sigurisë në Komisarariatit nr.3 Tiranë dhe vënien në funksion të plotë blloku/godina e sigurisë për Drejtorinë dhe komisarariatet e policisë në varësinë e saj në Tiranë.
2. **Ishte zbatuar rekomandimi**, për të mos mbajtur në ambientet e shoqërimit dhe të sigurisë, sende apo mjete të tilla që ekspozojnë dhunë psikologjike ndaj personave që mbahen dhe trajtohen në këto ambiente.

Ndërkohë, grupi i inspektimit konstatoi se **nuk kishin gjetur zbatim rekomandimet e mëposhtme:**

1. **Nuk ishte zbatuar rekomandimi** për marrjen e masave për nxjerrjen e përgjegjësive për mos garantimin e kushteve dinjitoze për personat e shoqëruar pranë komisarariatit nr.3.

¹ Rekomandim dt.16.06.2022 ProtK4/I21-2 Prot për inspektimin e kryer në komisariatin e policisë nr.3 Tiranë.

2. **Nuk ishte zbatuar rekomandimi** për nxjerrjen e përgjegjësive për mos zbatimin e rekomandimeve të Avokatit të Popullit, dhe komunikimi në vijim të masave të marra në lidhje me to.
3. **Nuk ishte zbatuar rekomandimi** për marrjen e masave për rikonstruksionin e dhomave të shoqërimit dhe sigurimin e kushteve të qëndrimit për të shoqëruarit sipas kapaciteteve.
4. **Nuk ishte zbatuar rekomandimi** për marrjen e masave të menjëhershme, për marrjen në dorëzim dhe vënien në funksionim të ambientit për intervistim e të miturve në konflikt me ligjin.
5. **Nuk ishte zbatuar rekomandimi** për marrjen e masave të nevojshme, për krijimin më vete të zyrës ku merren në pyetje personat e shoqëruar, si dhe instalimin e sistemit të monitorimit me kamera brenda saj, për monitorimin e veprimeve procedurale nga oficerët e policisë gjyqësore.
6. **Nuk ishte zbatuar rekomandimi** për marrjen e masave të menjëhershme për lyerjen dhe dezinfektimin e vazhdueshëm të ambienteve të këtij komisariati dhe në veçanti ambientin e dy dhomave të shoqërimit.
7. **Nuk ishte zbatuar rekomandimi** për marrjen e masave për pajisjen me kartën e të drejtave të personave të shoqëruar, që në momentin e shoqërimit në mjediset e këtij komisariati.
8. **Nuk ishte zbatuar rekomandimi** për marrjen e masave të menjëhershme, për trajnimin e punonjësve të policisë që kryejnë shërbim në zyrën e informacionit, për mënyrën e plotësimit me saktësi të regjistrit për evidentimin e të dhënave të personave të shoqëruar në mjediset e policisë.

Ndërsa disa nga rekomandimet kanë implikim buxhetore që nuk varen nga drejtuesit e komisariatit, vërejmë me keqardhje të thellë se disa të tjera lidhen me qasjen bashkëpunuese të drejtuesve ndaj rekomandimeve, ndonëse të pranuar dhe të përsëritura.

Avokati i Popullit vlerëson se drejtuesit kanë pasur kohë të mjaftueshme për të bërë kërkesat buxhetore për të përmirësuar situatën të paktën për disa rekomandime.

Në përfundim të inspektimit, u konstatua se në ambientin e shoqërimit në Komisaratin e Policisë Nr.3 në Tiranë, vazhdonin të ishin të pranishme disa problematika, si më poshtë vijon:

Ambientet e shoqërimit dhe kushtet e tyre

Ambienti i shoqërimit në Komisaratin e Policisë nr.3, Tiranë, **nuk është i ndërtuar** sipas parashikimeve të bëra në ligjin nr.108/2014 “Për Policinë e Shtetit” i ndryshuar, dhe Urdhrin e Drejtorit të Përgjithshëm të Policisë së Shtetit nr.938, datë 24.07.2019, për miratimin e procedurës standarde “*Rregullat teknike të shoqërimit në mjediset e*

Polici së Shtetit”, në dhoma të ndara më vehte për femrat, meshkujt madhorë dhe të miturit.²

Ambienti i shoqërimit ndodhej në katin e parë të godinës të komisariatit dhe kishte 2 (dy) dhoma shoqërimi. Dhoma e shoqërimit për të rriturit ishte me përmasa 4x2m, ndërsa dhoma e shoqërimit për femra dhe të mitur ishte me përmasa 4x3m. Çdo dhomë kishte nga 1 karrige për qëndrimin ulur të shtetasve, por ato ishin të dëmtuara dhe të konsumuara, pra në dhomat e shoqërimit mungonin karriget dhe tavolinat. Kapaciteti i deklaruar i dhomave ishte për mbajtjen dhe qëndrimin e deri 10 personave të shoqëruar. Numri i karrigeve (stolave) nuk i përgjigjej kapacitetit që kanë dhomat e shoqërimit. Nëse ato ishin me kapacitet mbi 4 persona, do të duhej të rrinin në këmbë ose ulur përtokë, që qartazi nuk plotëson standardin e trajtimit njerëzor të personave të shoqëruar, në kundërshtim me urdhrin, nr. 938 date 24.07.2019: Procedura standarde e punës për: “Rregullat teknike të shoqërimit në mjediset e Polici së Shtetit” në pikën 4. Kushtet e mbajtjes dhe Siguria për personat e shoqëruar ku përcaktohet në pikën d. Në mjediset ku pyetet i shoqëruari të kenë të vendosura pajisje e orendi pune për specialistët e ndihmës specialistët e polici së si; tavolina e karrige si dhe stola për qëndrimin ulur të shtetasve të shoqëruar, të cilat të jenë të fiksuara dhe të pa lëvizshme, si dhe në pikën e. Brenda këtyre ambienteve ose ngjitur me to, të ketë tualete, të ndara për femra dhe meshkuj, të pajisur me mjetet e domosdoshme për këtë qëllim.

Nga statistikat e nxjerra nga regjistri për evidentimin e të dhënave të personave të shoqëruar, rezultoi se për periudhën Janar 2023 ishin shoqëruar gjithsej 109 persona nga të cilët 11 gra dhe 6 të mitur.

Dritarja e dhomës ku qëndronin të shoqëruarit në moshë madhore, ishte me përmasa të vogla dhe nuk krijonte mundësi për ajrim dhe ndriçim të plotë natyral. Ndërsa, dhoma ku qëndronin shtetasit e shoqëruar femra dhe të mitur, ishte me dritare me përmasa normale që lejonte ajrimin dhe futjen e dritës natyrale. Ato kishin ndriçim nga rrjeti elektrik. Në pjesën e jashtme, dritaret ishin të siguruara me rrjetë të hollë hekuri.

Dhomat e shoqërimit nuk ishin të pastra nga ana higji eno-sanitare, ato kishin nevojë për lyerje dhe dezinfektim të herë pas hershme, pasi ndihej era e rëndë dhe muret e dhomave ishin të dëmtuara nga personat që kishin qëndruar brenda tyre.

Edhe ky konstatim është i vazhdueshëm mos reagimi ndaj kësaj çështjeje është e papranueshme.

Dyert e dhomave ishin prej druri të veshura me llamarinë dhe mbylleshin nga jashtë me shul dhe çelës. Mjedisi i shoqërimit dhe ambientet e tjera të komisariatit nuk kishin sistem qendror për ngrohje. Në katin e dytë të këtij komisariati ndodhej tualeti për personat e shoqëruar, i cili kishte ujë të rrjedhshëm dhe përdorej nga të shoqëruarit.

² Kreu VI, pika 3 e procedurës standarde “Rregullat teknike të shoqërimit në mjediset e Polici së Shtetit”.

Në ambientin dhe dhomat e shoqërimit të komisariatit, ishin të instaluar kamera për mbajtjen në vëzhgim të korridorit dhe të dhomave në mjedisin e shoqërimit, të cilat monitoroheshin nga punonjësit e policisë, nëpërmjet kompjuterit i cili ndodhej në zyrën e informacionit. Administrimi pamjeve filmike kryhej nga DPSH.

Në dhomat e shoqërimit nuk u konstatuan sende apo mjete të tilla, të cilat mundet të shërbenin për kryerjen e vetëvrasjeve apo për kundërveprim ndaj punonjësve të policisë.

Në kohën e kryerjes së inspektimit nuk kishte asnjë person të shoqëruar në ambientet e këtij komisariati.

Regjistri i personave të shoqëruar, ndaluar/arrestuar dhe evidentimi i tyre

Në Komisaratin e Policisë nr. 3, Tiranë, “Regjistri i evidentimit të të dhënave për personat e shoqëruar” ishte i tipit “Model nr.1”, sipas procedurave standarde “Rregullat teknike të shoqërimit në mjediset e Policisë së Shtetit”, i cili mbahej në zyrën e informacionit dhe ishte i sekretuar e i plotësuar sipas rubrikave.

Të gjithë personat e shoqëruar në organin e policisë sipas dispozitave të ligjit nr. 108/2014 “Për Policinë e Shtetit” regjistroheshin në këtë regjistër nga punonjësit e zyrës së informacionit. Nga këqyrja e këtij regjistri rezultoi se, regjistri ishte i sekretuar dhe rubrikat e tij ishin plotësuar nga punonjësit e zyrës së informacionit. Koha e qëndrimit në gjendje shoqërimi ishte e ndryshme nga 1 deri në 10 orë në raste të veçanta.

Ndërkohë, **përgjatë këqyrjes së këtij regjistri konstatuam se rubrika e regjistrimit mbi njoftimin e familjarëve nuk ishte e plotësuar në mënyrë korrekte**, pasi në regjistër nuk ishte i shënuar emri i familjarit të njoftuar me numrin e telefonit përkatës, por ishte shënuar nga specialisti i policisë vetëm “njoftuar familjari” e cila nuk identifikon familjarin i cili ka marrë dizeni³, kjo bazuar në Urdhrin, nr. 938 datë 24.07.2019 të Drejtorit të përgjithshëm të Policisë së Shtetit e përcaktuar në “Procedurën standarde të punës për “Rregullat teknike të shoqërimit në mjediset e Policisë së Shtetit” ku në pikën a.1.2 citohet se: Regjistri i Evidentimit të Personave të Shoqëruar: Të dhënat për realizimin e të drejtës për njoftimin e familjarëve/afërmve për shoqërimin si: emri, atësia, mbiemri dhe numri i telefonit të personit që është njoftuar për faktin e shoqërimit dhe të vend ndodhjes së personit të shoqëruar, si dhe orën e njoftimit.

Në këtë komisariat, punonjësit e policisë zbatonin detyrimin ligjor të parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde “Rregullat teknike të

³ *Masat mbrojtëse, veçanërisht në fazat e hershme të shoqërimit, janë thelbësore për të parandaluar abuzimet. Këto masa përfshijnë: dhënien e informacionit të të shoqëruarve për të drejtat e tyre; sigurimin e aksesit të një avokati; njoftimin e anëtarëve të familjes dhe/ose një palë të tretë për personin.*

shoqërimit në mjediset e Policisë së Shtetit”, për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë, që ishin ngarkuar me detyrën e kryerjes së verifikimit dhe trajtimit e çështjes përkatëse. **Nga këqyrja e “Procesverbalit të Shoqërimit”, konstatoam se në këto procesverbale shoqërimi nuk shënohej ora faktike kur ata janë shoqëruar për në organin e policisë, pra orën kur personit i është privuar liria por vetëm ora kur përpilohet procesverbali përkatës nga oficeri i policisë gjyqësore⁴.**

Gjithashtu, komisariati kishte regjistër më vehte për evidentimin e të dhënave të të miturve në konflikt me ligjin, si dhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 të ligjit nr. 108/2014 “Për Policinë e Shtetit”, i ndryshuar. Për periudhën e inspektimit nuk ishte evidentuar asnjë kërkesë apo ankesë nga ana e personave të shoqëruar dhe të ndaluar/arrestuar në mjediset e këtij komisariati.

Ambientet e sigurisë/kushtet e tyre dhe trajtimi i të ndaluarve/arrestuarve dhe i të shoqëruarve.

Në Komisaratin e Policisë nr.3 Tiranë, nuk kishte ambiente sigurie. Personat të arrestuar/ndaluar, pasi përfundonin veprimet procedurale nga punonjësit e policisë, dërgoheshin në “Bllokun e Sigurisë Tiranë”.

Ambientet e intervistimit

Në Komisaratin e Policisë nr. 3 Tiranë, oficerët e policisë gjyqësore i kryenin veprimet procedurale me shtetasit në zyrat e tyre. Këto zyra nuk ishin të monitoruara dhe ndërkohë në këtë organ nuk kishte ambiente të veçanta intervistimi të monitoruara me kamera gjatë kryerjes së veprimeve procedurale nga oficerët e policisë gjyqësore⁵.

Krijimi i zyrave të veçanta ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, është rekomandim i Avokati i Popullit referuar standardeve

⁴ Urdhëri, nr 938 datë 24.07.2019, Pocesverbali i veprimeve të kryera me personin e shoqëruar: në pikën a.3.2 përcaktohet se – Ky procesverbal pasi plotësohet duke hedhur të gjithë të dhënat sipas përcaktimeve dhe rubrikave të përcaktuara në të, nënshkruhet në fund të çdo faqeje nga punonjësi i policisë që ka kryer veprimet dhe nga vetë personi i shoqëruar.

⁵ “Një sistem i monitorimit të vazhdueshëm i standardeve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohej që të regjistrohen në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.” Raporti i CPT-së për Armeninë: CPT/Inf (2016) 31 [par.20].

<https://rm.coe.int/CoERMPublicCommonSearchServices/DisplayDCTMContent?documentId=09000016806bf46f>

ndërkombëtare⁶, të cilat e konsiderojnë procesin e monitorimit filmik si një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e Policisë së Shtetit. Ky standard ka gjetur rregullim edhe në procedurën standarde të miratuar me Urdhrin e Drejtorit të Përgjithshëm të Policisë së Shtetit nr. 925, datë 18.07.2019, “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, duke u shndërruar në rregull të detyruar për punonjësit e policisë.

Theksojmë se vijon të mbetet shqetësuese ndjekja e praktikës së marrjes në pyetje të të shoqëruarve në zyrën e punës së specialistit/oficerit të policisë gjyqësore në Komisaratin nr.3. Një praktikë e tillë bie ndesh edhe me Urdhrin e mësipërm të Drejtorit të Përgjithshëm të Policisë së Shtetit nr. 925, datë 18.07.2019, i cili në pikën 5 “*Rregullat e sigurisë gjatë marrjes në pyetje/intervistim dhe takimeve të ndryshme me të arrestuarin/ndaluarin*” parashikon veçanërisht kryerjen e kësaj procedure në një ambient të posaçëm siç është dhoma e intervistimit/marrjes në pyetje.

Nga monitorimi që u bë zyrave të oficerëve të policisë gjyqësore, nuk u gjetën sende prania e të cilave të ekspozonte dhunë tek personat me të cilët ata kryenin veprime procedurale. Në këtë Komisarati ishte një dhomë magazinë për administrimin dhe ruajtjen e provave materiale.

Nga inspektimi u evidentua se, në këtë komisarati ishte krijuar një ambient me dy dhoma për intervistimin e të miturve nga financimi i projektit suedez, me ambiente të ndara dhe të pajisura me orenditë e nevojshme, sipas parashikimeve ligjore. Ky investim ndonëse i përfunduar prej vitesh, nuk ishte vënë në funksionim. Intervistimi i të miturve në vazhdimësi kryhej në zyrat e punonjësve të policisë. Një konstatim ky i Institucionit të Avokatit të Popullit i cili ka rekomanduar përgjatë viteve 2020,2021,2022 për marrjen e masave dhe vënien në funksionim të këtyre dhomave por ngelet një rekomandim i pazbatuar. Në përgjigjen zyrtare me shkresë Nr.3786/1 Prot dat. 30.06.2022 komisarati i policisë nr.3 Tiranë na bënë me dije se janë duke bashkëpunuar me strukturat e tjera për vënien në funksion të këtij ambienti.

Avokati i Popullit shpreh shqetësimin e thellë se ndonëse në këtë komisarati ka një investim të finalizuar i cili është në interesin më të lartë të fëmijës, personat e mitur vazhdojnë të merren në pyetje në dhomat e punës të punonjësve të policisë

⁶ “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluar gjatë intervistës, si dhe të personave të pranishëm gjatë çdo interviste.” Raporti i CPT-së për Armeninë: CPT/Inf (2016) 31 [par.20].

Konsulto:

<https://rm.coe.int/CoERMPublicCommonSearchServices/DisplayDCTMContent?documentId=09000016806bf46f>

të cilat nuk plotësojnë standardet dhe bien ndesh me Kodin e Procedurës Penale si dhe të drejtat e posaçme të parashikuara në këtë Kod⁷.

Ndihma juridike, psikologjike dhe kujdesi mjekësor

Në Komisarriatin e Policisë nr.3, zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kreu VII, pika a.3.4 të procedurave standarde, për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimin e çështjes përkatëse.

Gjatë inspektimit, u bë këqyrja e dokumentacionit që ndodhej në zyrën e informacionit ku rezultoi se, ndaj personave të shoqëruar nga punonjësi i policisë mbahej një procesverbal tip i emërtuar “Formulari i raportit të shoqërimit ose ndalimit/arrestimit”, si dhe zbatohet detyrimi ligjor i parashikuar në nenet 34/b, pika 2 dhe 251 të K.Pr.P, që personit të ndaluar/arrestuar duhet t’i jepet dhe të mbajë me vete një kopje të procesverbalit të ndalimit/arrestimit.

Gjatë inspektimit u konstatua se në korridoret e godinës të këtij komisarriati ishin afishuar postera me të drejtat ligjore të personave të shoqëruar në organin e policisë. Avokati i Popullit thekson se Posterat duhet të vendosen brenda ambienteve të dhomave të shoqërimit pasi përgjatë kalimit në korridor nuk garantohet leximi dhe kuptimi i tyre nga të shoqëruarit.

Gjithashtu konstatuam se **në këtë komisarriat vazhdonte të mos zbatohet praktika** për pajisjen e personit të shoqëruar me kartën e të drejtave të personave të shoqëruar, që në momentin e shoqërimit në mjediset e këtij komisarriati.

Për sa më sipër dhe me qëllim zgjidhjen e problemeve të konstatuara gjatë këtij inspektimi, bazuar në pikën 3 të nenit 63 të Kushtetutës ku parashikohet se: *“Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike”* dhe në bazë të nenit 21/b të ligjit nr. 8454 dt.04.02.1999 *“Për Avokatin e Popullit”*, i ndryshuar, ku përcaktohet se: *“Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”*,

REKOMANDOJMË:

1. Marrjen e masave për nxjerrjen e përgjegjësive për mos garantimin e kushteve dinjitoze për personat e shoqëruar dhe ndaluar pranë komisarriatit nr.3, por edhe për shkeljen e të drejtave të qytetarve e lidhur me komunikimin e kohës të së drejtave dhe zhvillimin e intervistave në ambiente të përshtatshme.

⁷ Ligj Nr. 37/2017 Kodi I Drejtësisë Penale Për Të Mitur.

2. Drejtori i Drejtorisë Vendore Tiranë të marrë masat për drejtuesit e komisariatit për nxjerrjen e përgjegjësive për mos zbatimin e rekomandimeve të përsëritura të Avokatit të Popullit, dhe komunikimi në vijim të masave të marra në lidhje me to.
3. Marrjen e masave për rikonstruksionin e dhomave të shoqërimit dhe sigurimin e kushteve të qëndrimit për të shoqëruarit sipas kapaciteteve.
4. Marrjen e masave të menjëhershme, për marrjen në dorëzim dhe vënien në funksionim të ambientit për intervistim e të miturve në konflikt me ligjin, dhe nxjerrjen e përgjegjësive ndaj punonjësve të cilët nuk kanë marrë masa për vënien në funksion të këtij ambienti ndonse i përfunduar prej vitesh.
5. Marrjen e masave të nevojshme, për krijimin më vete të zyrës ku merren në pyetje personat e shoqëruar si dhe instalimin e sistemit të monitorimit me kamera brenda saj, për monitorimin e veprimeve procedurale nga oficerët e policisë gjyqësore.
6. Marrjen e masave të menjëhershme për lyerjen dhe dezinfektimin e vazhdueshëm të ambienteve të këtij komisariati dhe në veçanti ambientin e dy dhomave të shoqërimit.
7. Marrjen e masave për pajisjen me kartën e të drejtave të personave të shoqëruar, që në momentin e shoqërimit në mjediset e këtij komisariati.
8. Marrjen e masave për plotësimin me korrektësi të “Procesverbalit të Shoqërimit”, duke shënuar orën faktike kur ata janë shoqëruar për në organin e policisë, pra orën kur personit i është privuar liria dhe jo vetëm orën kur përpilohet procesverbali përkatës nga oficeri i policisë gjyqësore.
9. Marrjen e masave për plotësimin me korrektësi rubrikën njoftimi i familjarëve tek Regjistri i personave të shoqëruar dhe evidentimi i tyre në këtë regjistrë.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit Nr. 8454, datë 04.02.1999 “Për Avokatin e Popullit”, i ndryshuar

Duke besuar në mirëkuptimin dhe bashkëpunimin tuaj.

KOMISIONER

AHMET PREÇI

